

## Yaaq'ubee otk'unin kağız

İn kağız Yaaq'ubee, I'sa Masixhne xınee otk'unva eyhe. Mana I'sa Masixhne İyerusalimeene ummatna xərna ıxha.

Yaaq'ubee man I'sayne cühüt' telebabışisva otk'un. Mañıl-allad mang'vee ek'da-ek'da cühüt'yaaşine Muq'addasne Otk'unıybışeençen misaalabı qalya'a ıxha. Mang'vee imanıs sik'ı nəxübiy ı'mı'r haa'as vukkanva otk'un. Sayid mang'vee karnanbışdeyiy kar deşinbışde, düəyne, sabırne, mizene hək'ee oyk'an. Yaaq'ubne q'omane, ts'eppiye fıkrıbışda sa – iman çis sik'ıyn işbı dena qek'an.

### *Yaaq'ubee salam hoole*

<sup>1</sup> Zı Yaaq'ub Allahnayiy yişda Xərna eyxhene I'sa Masixhna nukar vor. Zı şos, milletbışde yı'q'nee opt'ul-opxulne yits'ıq'vəne (12) İzrailıyne nasılıs salam hoole!

### *K'orana ək'eliy iman*

<sup>2</sup> Yızın çocar, şu geedne dağamne karbışika siliys üvxiyxəmee, mañıs geeb şadeepxhe. <sup>3</sup> Şok'le ats'an vuşun iman siliys ı'xı'yxəmee, şos sabır xət qexhe. <sup>4</sup> Sabır vuşde ad manimee xət qixhes ıkkən, şu gırgıne karee kaamilyba, mu'munba vuxhecənva. Məxüb şu vuşde yik'eene gırgıne yugne karbışılqa hivxharasınbı. <sup>5</sup> Vuşde şavukamecab k'orana ək'el hivdiyxharxhee, mana Allahıke hevqe.

Mang'vee mana qivdiykkın, hexxan ittevhu girging'us hoole. <sup>6</sup> Şavaayiy hooqqa, vooxheyedyooxheyeva immeyhecen, hasre mançılqa inyam he'ecen. Vooxheye-dyoxheyeva eyhenar, mıtın ıǵviykar hav'u daǵabaççene deryahne mirtık akar. <sup>7</sup> Hasre məxrıne insanne ək'leeqa qımaylece, mang'us hucoomecad Rəbbe helesınnıyxhanva. <sup>8</sup> Məxrına sa karal it'umra ulyoyzar deş, nenacab yəq avqaqqa deş.

### *Karnanayiy kar deşda*

<sup>9</sup> İmannane kar deşde insanık'le cuna axtına cıga vaats'a vuxhes vukkan. <sup>10</sup> Karnang'uk'lemee cuna avqana cıga vaats'a vuxhes vukkan. Mana çolun t'et' xhinne hı'ç'ı'ǵenasda. <sup>11</sup> Veriǵ qıǵevç'umee, mançine yıssıyaxalın ok' qooqqaa'a, ok'alın t'et' k'yatk'ınmee, mançına micagıyvalla avayk'anna. Həməxrır karnana insan cune işbışee k'eçe.

### *Siliys üvxiyne hək'ee*

<sup>12</sup> Siliys ı'xı'yxəmee, sabır hı'ına insan nımee baxtivariy! K'anyaqqamee öörxı'ıng'us Allahee yugna pay, girgıne gahbışıda ı'mı'r hevles. Allahee mana pay Vuc ıkkananbışde girging'us hevlesva cuvabniy huvu. <sup>13</sup> Siliys ı'xı'yxəmee, hasre neng'veecad «Allahee zı siliysır ı'xı'yxəva» immeyhecen. Allah Vuc pisde karbışıka siliys ı'xəs eyxhe deş, Vuceeyir vuşucar pisde karaka siliys ı'xı'yxənə deş. <sup>14</sup> Girgın insanar cos ıkkanne karbışincab siliys üvxi'yxə, mane karbışın manbı hoot'alanbı, çılqa saa'a. <sup>15</sup> Qiyğa man ıkkanan kar yik'ek at'itq'ınxhee, siyk'alan

bınahılqa, hav'una bınahıb geeb quvxha insan gek'ana.

<sup>16</sup> Zas vukkanan çocar, horan humoot'alcen!  
<sup>17</sup> Yugna barakat, nekke yugun gırgın karbı xəənçenbı vodunbı. Man gırgın Dekkee huvuyn vodun. Mang'vee verığ, vaz, xənebı itxhın. Mana badal dyooxhene yugvalile sayır uvhuynçile sidiyk'alna vor. <sup>18</sup> Mang'vee ši qopkune cuvabıka ipxhın. Mang'us Cus vukkiykın, ši g'əvxü, Vuçe itxhınne karbışın ts'eppiynbı hav'u.

*Allahee eyhen g'ayxhı, man hı'iy*

<sup>19</sup> Zas vukkanan yızın çocar, hasre gırgıne insanaaşe k'ırı alixxhesnang'a k'ırıbı ç'ak'ıda aaqecen, cuvab eyhesnang'amee, ghal k'ılda eeqecen, qəlasın eyhesnang'ab sabırıka vuxhecen. <sup>20</sup> İnsan qəlıkanang'a, mang'vee Allahıs ikkanan qotkun karbı ha'a deş. <sup>21</sup> Mançıl-allab pisvaalab, qəlib g'alepçe. Allahee şok'le eyhençil yugda k'ırı alixxhe, Mang'une cuvabıqa ooğançe avqa ilymaaka. Mang'un cuvab vuşde ad xət qıxhecen. Mançisse şu g'attivxhan ha'as vəəxə.

<sup>22</sup> Allahee eyhençil saccu k'ırıcad deş alixxhes ikkan, mançin eyhenıd ha'as ikkan. Deşxheene, şucad şos horbı ha'anbı xhinne eyxhe. <sup>23</sup> Uvhuyn g'ayxhı man hidya'ana, naxvareeqa ilyakkane insanık akar: <sup>24</sup> Mana cuqacar ilyakki, şaqana ark'ınmeeyir, mankecar vuc nəxrına ıxhay yik'el hiyxan. <sup>25</sup> Şavaayiy Allahna qopkuna, g'attivxhan haa'ana Q'aanun vuk'leeqa k'yabaççe, Q'aanunun hucooyiy eyhe

ha'a, g'ayxhiyn yik'el hixan hidya'a, məxrına insan cune işee baxtivar ixhes.

<sup>26</sup> Vuşde neng'unemecad ək'eleeqa vucee Allahna yəq' avquva qöoxhee, məxrıng'usse mizib saa'as dəəxəxhee, mang'vee cuscad horbı ha'a. Mang'vee avquna Allahna yəq'ı'b nişiscab kara abayle deş. <sup>27</sup> Allahne, yişde Dekkine ögil məttına, bınah deşda, Allahna yəq' avquna ina eyxhe: dekkiy yed dena avxuynbışis, adamer dena avxuynbışis dağamiyvaleeqa gyapk'ımee, manbışda haa'ana, dyunyeyne mı'q'ı'ne işbışılqa ilydekkana.

## 2

### *Gırgınbı akaraba avqe*

<sup>1</sup> Yızın çocar, nureene I'sa Masixhılqa, yişde Xəring'ulqa şu iman ha'axhee, şu, sa insan mansang'ule ooqa aqqas ıkkın deş.

<sup>2</sup> Şu sabıyne cigeeqa, hiib-qiib q'öyre insan ikeepç'eene, manbışde sang'ul gıranın tanalinbıyiy t'ubelib k'inəəğəyna t'ucva vuxheene, q'ör'es ikkeç'unar kar deşda, yisseyne tanalinçee ixheene. <sup>3</sup> Şu gıranın tanalinbı

alı'ıyng'uqa ilyaakı: «Qora, ina yugna ciga vob, inyaa gyu'reva», kardeşing'uk'led «Ğu maa'acar ulyozreva», «De'eş, ğu qarı, yizde g'elybışee car gyu'reva» uvheene, <sup>4</sup> şu məxür sa mansag'ule ooqa aqqaqqa, kararı'dəən fıkrınan haakımar xhinne qeebaxhe.

<sup>5</sup> Zas vukkanan çocar, həşde şu zal yugda k'ırı alixhxhe. Allahee ine dyunyel kar deşınbı g'əvxü, manbışis geed iman huvu. Mang'vee

cuvabniy huvu, Cuna Paççaahiyvalla Vuc ikkanne gırgıng'us hevlesva. Məxüdü Mang'vee kar deşınbışıs ha'as. <sup>6</sup> Şumee kar deşda uleke alışşu. Nya'a, şu karnanbışe dışde hooç'an-g'ooç'an, məhkamabışeeqa ts'its'aa'a? <sup>7</sup> Nya'a, manbışe dışde, vuşde Xəring'un I'sa Masıxhın do g'eliqqa hele?

<sup>8</sup> Allahne Paççaahıvalıne Q'aanunee otk'un vod: «*Vas k'anena, vas ğu nəxüriy ikkan həməxür ikkiykne*». Şu man eyhen ha'axhee, yugda vod ha'a. <sup>9</sup> Şu sa insan mansang'ule ooqa aqqaqqaxhee, şu Q'aanunun eyhen ha'a deş, bınah haa'a. <sup>10</sup> Şavaayiy Q'aanunee eyhe-eyhen ha'a, mançeedın sa karxheeyid hidya'a, gırgına mansançına bınah mang'us vob. <sup>11</sup> «*Zina huma'ava*» Uvhuyng'ee «*Gimek'avad*» uvhuynniy. Ğu zina hidyı'ı, insan gik'veene, meer Q'aanunun eyhen hidya'ana xhinnecar eyxhe.

<sup>12</sup> Allahee insanar g'attivxhan haa'ane Q'aanunus sik'ı şu məhkameeqa ts'its'a'as. Mançıl-allad ghalençe qı'ğəənçılqab, şu ha'ançılqab yugba fıkır hevle. <sup>13</sup> Rəhı'm hidyaa'ang'uka rəhmıka vuxhes deş. Ğu rəhmıxaxhee, Rəbbeeyid vas rəhmıkan məhkama alğahas.

### *İmaniy işbı*

<sup>14</sup> Yızın çocar, şavaameecad «Zaqa iman vodva» eyhemee, çıs sik'ınınd işbı hidya'amee, nya'a, mançike hucoone ixhes? Məxdıne imanısse mana g'attixhan ha'as əxəyee? <sup>15</sup> İlyaake, vuşde çocuqayee, yiçuyqayee tanalqa alya'aniy otxhanan kar deşxhee,

16 şunad manbışis ikkanne karbışin nencad hidevu, manbışik'le «Nişinacab hımaa'a, g'ümə apk've, kar oxhneva» uvhuva, nya'a, mançike manbışis hucoona hiyxhar? 17 İmanıd həməxüdüd vod, şoqa mançis sik'ıyn işbı deşxhee, man qik'ıyn xhinne eyxhe.

18 Vuşde şavussemececad eyhes əxə: «Vaqa iman vod, zaqad mançis sik'ıyn işbı». Vasse yığın iman mançis sik'ıyn işbı dena hagvas əxəsinne? Yızın imanıd yizde işbıdcad hagvas. 19 Ğu Allah sa vornava inyam ha'axhee, manıd yugda vod. Vak'le ats'an, mançılqa cinaaşed inyam ha'an, Mang'ule qətq'ı'n, mançisıb zeze ooxhana.

20 Ək'el deşda insan, vak'le mançis sik'ıyn işbı denan iman nişiscad karı'dəəva ats'anne?

21 Yişda dek eyxheene İbrıhımee, cuna dix I'saq' q'urbanbı allya'ane cigalqa gixhxımee dişdiy, Allahee mana qorkunava uvhu? 22 Vak'le g'ecen, mang'un işbiyy iman sana-sançike cureedaxxhe deş. Mang'une işbişe, mang'un iman hək'en ıxhay hagu. 23 Məxüd Muq'addasne Otk'unee otk'unin eyxhe: «İbrıhımee Allahee uvhuynçılqa inyam ha'a, mançıl-alla Rəbbeyir mana qorkuna insan xhinne hı'sab ha'a». İbrıhımık'led Allahna hambazva eyhe. 24 Şok'lececad g'ecen, insan saccu imanıkacar deş, hı'iyne işbışıkar çikana qorkuna eyxhe.

25 Yəqqı'le qığeyç'una Raxav yik'el qiyelee'e. Məng'ee izrailybışe g'axuvuynbışis aaxvasda ciga huvu, manbı mennecab yəqqı'n yı'q'əlqa

savaak'al hav'u\*. Nya'a mana, mane yice hav'uyne işil-alla dişdiy qorkuna hı'sab hey'ı?

<sup>26</sup> Nəxdiy can nafas dena qek'a, həməxüdüd iman çis sik'ıyn işbı dena qek'a.

### 3

#### *Mizene hək'ee*

<sup>1</sup> Yızın çocar, şoqa geeb mə'əllimar mooxhecen. Şok'le ats'an, şi, mə'əllimaaşe geed yı'q'ı'n hı'sab qeles. <sup>2</sup> Yişde gırgıng'vee gellesde işbışee bınah haa'a. Şavaayiy cuvab eyheng'a bınah hidyaa'a, mana mu'mun, cussecar vuc xile aqqas əxəna insan vor.

<sup>3</sup> Balkanaaşə şi eyhen he'ecenva, şi mançine ghalyaqa g'antarağa qa'a. Mançile qiyğab şi mana şas vukkanne suralqa alivk'ar haa'a.

<sup>4</sup> İlyaake, nimee xədnın gamı ixheeyid, nimee ç'ak'ın mıtsbı e'eeyid, man ar ulyorzulyung'vee k'inne ruluka, cus ikkanne suralqa he'ekka.

<sup>5</sup> Mizenüdüd həməxüdüd ha'a, tanan sa k'inin sura ixheeyid, çincab vuc geeb xəbna xhinne haagva.

İlyaakende, sa k'inne ts'ünqün bıkırrın ç'alagcad gyoxhıxhan ha'a.

<sup>6</sup> Mizib ts'acab vobna. Miz canane əzaabışde əree nekke qopkuvalla deşin əzaa vod. Mançin insan bıkırra əqə'əna. Mana

---

\* **2:25** 2:25 Allahee cos helesva uvhuyn cigabı İzrailybışe aqqımee, manbı qabı hıviyxharanbı İyerixon eyhene şaharısqə. Manbışe şahareeqə q'öyre caasus g'ıxele. Raxav eyhene zəiyfee manbı şaharne ç'ak'ınbışile dyugul haa'a. Mana şahar İzrailybışe avqımee, mane zəiyfaykiy mənğ'ı'ne k'anenbışik soot'a deş. Manbı qiyğa İzrailyne milletül ulyookka.

cehinnyamıke g'ooxha, qiyğab mançin ı'mı'rcab gyooxhan ha'a.

<sup>7</sup> Gırgıncad həyvanar, şit'yar, hadağvan həyvanar, deryaheedın həyvanar, manbı insanaaşisse saq'vana'as əxənbı. <sup>8</sup> Miz saq'vana'asmee insanaaşine neng'ussecab vəəxə deş. Miz avqas dyooxhena balyaa vob, mana gyabat'ane zəhərıka gyavts'u vob.

<sup>9</sup> Şi mane mizeka yişda Rəbb, Dekkır axtı qa'ana, insanaaşısib bed-düə haa'ana. Nya'a, gırgın insanar Allahee Cuk akaraba dişde ipxhın? <sup>10</sup> Sa ghalençecab şukurub, bed-düəəyib qığəəna. Yızın çocar, məxüd ixhes ıkkən deş. <sup>11</sup> Sa xhyan ı'lqəəne cigeençe, sayangada yuguniy q'ap'ın xhyan ılqəç'ennexhe? <sup>12</sup> Yızın çocar, inciliyne yivesse zeytun, tayangısseb inciliy aleylyaa'as vəəxəyee? Həməxdıd, sa xhyan ı'lqəəne cigeençe sayangada, yuguniy q'ap'ın xhyan ı'lqəən deşxhe.

### *Xəənçena k'orana ək'el*

<sup>13</sup> Vuşde yı'q'nee, k'orana ək'elynanayiy k'oran ats'alynana vornane? Vuceecar vuc axtı qıdy'ı, hasre mang'vee, vucee haa'ane yugne ı'mreeka, vucee hı'iyın yugun işbı k'orane ək'elika hı'ıva hagvecen. <sup>14</sup> De'eş, şu vuşdacab haa'axhe, vuşde yik'eeyib paxılıyvalla vobxhe, şucab şu axtıba vukmekka, şu məxüd hor ha'a. <sup>15</sup> Məxbına k'orana ək'el xəənçe qabına deş vob, mana ine dyunyeyne, insanna, şeyt'anıkəna vob. <sup>16</sup> Nyaabiy insanaaşe conacab haa'a,



paxılıyvallab vob, maa'ad alikkı-gıkkıy, geed pisvalybı eyxhe.

<sup>17</sup> Xəənçena k'orana ək'el alyapt'ına insan yik' məttına, siç'dekvana, g'üvənana, mizelqa qaraylena, yik' gyotxhanna, yugun işbı ha'ana, neng'uncad sura ıqdyaqqana, aq'vasın hidya'ana vorna. <sup>18</sup> İnsanaaşın uğoodıybiyiy duşmanıyvallabı ç'əv haa'anbı yugna toxum oozıynbışik akar. Məxbınbışe qiyğad qopkuvalin şagav sa'a.

## 4

*Dyunyeykana hambazıyvalla, Allahıkana duşmanıyvalla vob*

<sup>1</sup> Nənçene şos cuvabılqa abıy eyxhe, nya'a şoqa aldapxhın-g'adapxhınıybi eyxhe? Nya'a, man şu abğançe oodane xuruşbışike dişde vod?

<sup>2</sup> Şos hucoomecad ıkkang'a, şosse man xılel qa'as dəxəmee, şu insan gek'a. Şu paxılıyvalla haa'a şos hucoomecad ıkkanmee, man kar xılel qa'as dəxəmeeyid, uğoodanbı. Şu Allahıke hid-eqqava, şoqa man kar deş. <sup>3</sup> Şu man heqqanıd, şos heled deş. Şu man vuşde kefike, pisde işbışis heqqava hıdele.

<sup>4</sup> Allahne yəqqı'le qıkkepç'ıynbı! Şok'le ats'a dişde, ine dyunyeykana hambazıyvalla, Allahıkana duşmanıyvalla vobna? İne dyunyeyka hambazıyvalla haa'as vukkanang'vee, cuke Allahıs duşman ha'a. <sup>5</sup> Sayid şosqa həməxüdməde qöö, Muq'addasne Otk'unee həməxüdcadme otk'un: «Nya'a Allahee dişde, şas rı'h huvu? Mang'us şı vukkan vuxhal-alla, Mana öörəxə

deş şi Cule ğayrı mering'us ı'bəədat ha'amee». <sup>6</sup> Mang'vee şas mançile hexxanab yugvalla haa'ana. Mançil-allad Muq'addasne Otk'unee inəxüd eyhe:

*«Allahee cocab co axtıba  
vukkekkanbışda yəq q'ats'aak'van,  
Cocab co axtıba vukdekkannışismee  
Cuna yugvalla haagva».*

<sup>7</sup> Mançil-allab Allahee eyhençiqa gyuv'ur-oza qeepxhe, iblisis ıkkanan hıma'a, manke iblisd şoke hixvasın. <sup>8</sup> Allahıs k'ane qeepxhe, manke Manar şos k'ane qixhes. Bınahnanbı, xıleppi hoğle, Allahne yəqqı'l it'umba ulydobzuriynbı vuşun yik'bı mətte'e. <sup>9</sup> Aq'vabı qe'e, ak'avqe, gyaaşe! Hasre vuşun əqəna gyaaşuylqa, şadvallab derdılqa savk'lece. <sup>10</sup> Rəbbine ögil haaq'vre, Mang'veeyib şu axtı qaa'as.

<sup>11</sup> Çocar, sana-sang'une hək'ee pısın immeyhe. Şavaayiy çocune hək'ee pısın eyhe, şavaayiy çoculena haa'a, məxrıng'vee Q'aanunub pis haa'a. İnsanee Q'aanunulena haa'axhe, mana Q'aanunun eyhen ha'ana deş, mançına haakim eyxhe. <sup>12</sup> Q'aanun Huvunar, Haakımır sa Allah vorna, gyapt'asıb g'attivxhan haa'asıb vəəxəna saccu Mana vor. Ğu vuşuna eyxhe, yiğne k'anering'us ğucar vake haakim haa'a?

*Umud valqa deş, Allahılqa hee'e*

<sup>13</sup> Həşde məxüd eyhenbişe k'ırı alixxhecen: «G'ıynayee, g'iyqayee şi sa neneme şahareeqa hapk'ın, maa sa senna avxu, kar alişşu massa

huvu, pıl ha'as». <sup>14</sup> Mançılqa axvee, şok'le g'iyqa vuk'lelqa hucoome qales ats'ad deş. Yişda i'mi'r hucoo eyxhen karne? Sık'ınna gahna g'ecene, qiyğad ayk'anne booğak akar. <sup>15</sup> Mançilesa şu eyhe: «Rəbbis ikkiykınee, hidyapt'ı avxvee, manayee, mebnayee iş haa'a». <sup>16</sup> Həşdemee şu, gırgın vuşde xiledın xhinne, gırgın şosse əxən xhinne yuşan haa'a. Məxüb yuşan hav'uy qotkuda deş vod. <sup>17</sup> Şavuk'leyiy vucee yugun ha'as ikkanva ats'a, yicid hidya'a, məxrıng'vee bınah haa'a.

## 5

### *Karnanbışılqa hixhar he'e*

<sup>1</sup> Həşde, kar geednanbı şu zal k'ırı alixhxhe. Vuşde vuk'lelqa qalesde yiğbışıl-alla hülöübəxə gyaaşə. <sup>2</sup> Vuşun kar qı'çıyn, tanalqa alya'anbıd guvayn otxhun. <sup>3</sup> Vuşun k'inəəğəyiy nuk'ra pasın aqqı. Mançilin pas vuşde aq'veeqa ulyozaras, mançin şu ts'ayin xhinne gyooxhan haa'as. Q'iyaamatın yiğ qadı hiyxhar vod, şumee kar sı'iyke aats'e deş. <sup>4</sup> Şu vuşun cigabı qiyşalanbışis hək' quvu deş. Həşde mançin vuşde aq'veeqa ts'ir haa'a. Xəybişde Xəring'uk'le Rəbbik'le qivişalanbı hülöübəxə gyaaşuy g'ayxhiyn. <sup>5</sup> Şu ç'iyeyne aq'val gyavts'u-gyuvxhu, şos ikkananbı ha'a iviykır. Şu gyatt'asde həyvanaaşə xhinne otxhuniy otxhun. <sup>6</sup> Şu şok sidet'uyne qorkung'une, hıdı'iyncad kar gardanaqa gixhxı, mana gik'u.

### *Sabırka vuxhe*

<sup>7</sup> Yızın çocar, yişda Xudaavanda qalesmee sabırbı he'e. İlyaakende, sa kar ezuna, mang'unemee manimee gıranın şagav aylesmee nimee sabırıkayıy eyxhe. Mana tsuvuliyıd yuxhxhaniyınđ gyoğiybı ixhesmee, sabırile g'e'exhxha deş. <sup>8</sup> Şunab sabırıka, yik'eka vuxhe, yişde Xudaavandayn qariy k'ane qıxha vod. <sup>9</sup> Yızın çocar, şolqa cuvab qıdyadıynemee, sana-sang'ulena hımaa'a. Yişda Haakim qalesın yiğid k'ane qıxha vod.

<sup>10</sup> Yızın çocar, Rəbbine doyuale yuşan haa'ane peyğambaraaşike misaal aleet'e, əq'übabışis ööpxü, sabır hı'iy xət qıxhe. <sup>11</sup> Şi baxti-vararva ööpxürıynbışik'le eyhe. Şok'le Əyı'b peyğambarne sabırene hək'ee g'ayxhiyn. Şok'le ats'an Rəbbe nekke qiyğa mang'us xayır-düə hoole. Xudaavanda geer rəhi'mıkana, yik' gyotx-hanna ıxhayl-alla məxüd ha'a.

### *K'in g'imıysar*

<sup>12</sup> Yızın çocar, mısacad xəəlqan, ç'iyelqan nişilycad-alla k'in g'imıysar. Hasre vuşun «ho'o» ho'o ixhecen, «de'eşıd» de'eş ixhecen. Deşxheene, şu mançıl-alla Allahıke cuvab alyaat'as.

### *Düəyna guc*

<sup>13</sup> Vuşde neng'veemecab əq'üba opxhanxhee, düə hee'e. Şadnar vorxhee, ilaahi qəpəqə. <sup>14</sup> Şoqa ik'arna vorxhee, iman ha'anbışde ummatın ağsaqqalar qoot'le. Hasre manbışed Rəbbine doyuale düə qəbəqqə-qəbəqqə, mang'ulqa zeytunun q'ış qadğvecen. <sup>15</sup> İmanıka hav'uyne

düəyn mana yug qa'asda, Rəbbeə mana g'elil qa'asda. Ik'arang'vee bınah hav'uxhee, Xudaavanda mang'une bınahıler ılyheç'esda.

<sup>16</sup> Sana-sang'uk'le şu hı'iyın bınahbı eyhe, sana-sang'ul-allad düəbı he'e yug qeepxhecenva. Qorkung'une düəysse geed kar ha'as əxə.

<sup>17</sup> İlyas peyğambarır şına xhineena insan ıxha. Mang'vee yik'eençe gyoğiy mexhecenva düə haa'a. Mançile qiyğa xhebille sennayiy yixhıble vazna gyoğiy eyxhe deş. <sup>18</sup> Qiyğa meeb mang'veecab düə hav'umee, xəybışe gyoğiy gyoğa'a, ç'iyeynıd kar aleylya'a.

<sup>19</sup> Yızın çocar, vuşda nenamecar Allahne yəqqı'le sark'ılee, şunar mana qorkune yəqqı'lqa sak'al he'ee, <sup>20</sup> manke şok'le ats'axxhe, şu mana qik'uyke g'attixhan hı'ı, geedne bınahbışıke havacı.

**Tsakhur**  
**Portions of the Holy Bible in the Tsakhur language**  
**of Azerbaijan**

copyright © 2022 Pioneer Bible Translators

Language: Ts'əxna miz (Tsakhur)

Contributor: Institute for Bible Translation

<https://ibtrussia.org/en/media?id=TSK>

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-18

---

PDF generated using Haiola and XeLaTeX on 22 Feb 2024 from source files dated 19 Apr 2023  
6257bde4-455f-5247-95e7-0a89f1fdd1f1